



SESI BERGAMBAR Dr. Ismail (enam dari kanan) dan para tetamu lain bergambar bersama pelajar-pelajar FKJ yang akan memulakan latihan industri pada 24 Jun ini.

OLEH MARRYAN RAZAN

NST 18.6.2017 6

KOTA KINABALU: Universiti Malaysia Sabah (UMS) terus berusaha meningkatkan kebolehpasaran graduannya di peringkat antarabangsa melalui pelbagai kerjasama mobiliti dan latihan industri bersama beberapa syarikat dan agensi luar negara.

Sehubungan itu pada tahun ini, seramai 25 pelajar Fakulti Kejuruteraan (FKJ) UMS terpilih untuk menjalani latihan industri selama 10 minggu di beberapa agensi kerajaan dan syarikat industri di Jepun dan Korea Selatan.

Penyelaras Latihan Industri FKJ, Dr. Melvin Gan Jet Hong berkata, kesemua pelajar tersebut termasuk enam pelajar dari Sabah akan menjalani latihan industri itu bagi memenuhi lima jam kredit subjek Latihan Industri yang diwajibkan kepada setiap pelajar selepas mereka menamatkan pengajian selama 6 semester.

“Program ini memberi peluang kepada pelajar untuk menimba pengalaman suasana pekerjaan sebenar dengan mengaplikasikan segala pengetahuan dan teori yang dipelajari dalam latihan industri mereka.

UMS tingkat kebolehpasaran graduan di luar negara

“Dengan ini para pelajar mampu mengembangkan kemahiran mereka dalam aspek etika kerja, komunikasi, pengurusan dan bekerja dalam satu kumpulan,” katanya.

Beliau berkata demikian ketika menyampaikan penerangan berkaitan latihan industri pada Majlis Persediaan Latihan Industri Pelajar FKJ Ke Luar Negara di Bilik Seminar FKJ, pada Jumaat.

Dr. Melvin berkata program tersebut dimulakan sejak 2015 dengan empat pelajar Program Kejuruteraan Mekanikal terpilih menjalani latihan industri di Korea Lab Co. Ltd, dan disusuli 11 pelajar Program Kejuruteraan Mekanikal bagi latihan industri di beberapa

syarikat industri di Korea Selatan.

“Selama 2 tahun program ini berlangsung, pelajar UMS sentiasa mendapat maklum balas positif daripada penyelia masing-masing, termasuk seorang pelajar dari Sabah yang mendapat tawaran bekerja di Korea Selatan sejurus menamatkan latihan industri,” katanya.

Terdahulu itu, Timbalan Dekan (Akademik dan Antarabangsa) FKJ, Prof. Madya Dr. Ismail Saad mengingatkan para pelajar agar menjaga tingkah laku dan tidak mencemarkan nama baik UMS sepanjang menjalani latihan industri.

“Para pelajar perlu memanfaatkan peluang yang tersedia untuk memperoleh segala ilmu

pengetahuan dan menempatkan diri dalam industri, selain menimba pengalaman hidup di luar negara dengan mempelajari aspek budaya hidup masyarakat di Korea Selatan dan Jepun,” katanya.

Pada majlis itu, Dr. Ismail menyerahkan bendera Jalur Gemilang kepada wakil 25 pelajar yang terpilih sebagai simbolik persediaan latihan industri pelajar FKJ ke luar negara.

Turut hadir Timbalan Dekan (Hal Ehwal Pelajar & Alumni) FKJ, Dr. Mohd Kamel Wan Ibrahim, Timbalan Pendaftar FKJ, Azmi Jumat dan Pengarah Pusat Hal Ehwal Antarabangsa, Molly Donna Awang Sham.